



ATASSUT

UPA14/71

Knud Kristiansen

27.05.2014

Kalaallit oqaasiisa takornartat oqaasiisut ilinnialernissaannut qanoq iliorluta inersimasunik kajumissuseqalersitsinissarput pillugu apeqquaqaat aallaavigalugu oqallinnissamik siunnersuut.

(Inatsisartunut ilaasortaq Andreas Uldum, Demokraatit)

ATASSUT-miit oqallinnissamut siunnersuuteqartoq qutsavigaarput.

Oqaatsitta tamatigut ineriartornissaat, aammalu naleqarluartumik atorneqarlutillu ilinniarneqartarnissaat ATASSUT-miit politikikkut anguniakkatta pingaarnerit ilagaat.

Soorlu siunnersuuteqartup ersarissumik oqariartuutigigaa, suli nunatsinni allamiut oqaatsitta annerusumik ilinniarlugillu ulluinnarni atornissaat pisariaqartoq. Aamma ilinniaritaanerup, pikkorissarnikkullu periarfissat tamaasa eqqarsaatigalugit.

ATASSUT-miit pingaartutut isigaarput, suliffeqarfiit oqaatsitta pikkorissarnikkut ilinniarnissaannut periarfissaqartitsinerat suli annertunerusariaqarmat. Pingaartumik suliffimmi oqaatsit pillugit politikkeqarnikkut. Sulisut pillugit politikkeqarnermi, aamma oqaatsit pingaartillugit politikkeqarnikkut sulisunut kalaallisut oqaaseqanngitsunut periarfissiinerusaaq pitsaasoq.

Taamaattorli ATASSUT-miit ilisimavarput, suliffeqarfippassuit aningaasatigut periarfissaqanngimmata, tamannalu aamma sulisut periarfissaqartinnissaannut ajornartorsiutaasarmat.

Ilumoorpoq, oqaatsitta eqaatsumik, aammalu ulluinnarni atorneqarsinnaasutut pikkorissarfiginiarneqarneri suli pitsaanerusumik aqutissiuunneqartariaqarmat. Aamma pingaartikkutsigu oqaatsitta ulluinnarni allamiunit ilinniarneqarnissaat, atorneqarlutillu, taava aamma illua-tungaani tamakkiinerusumik periarfissaqartittariaqarparput, akissaqartillugulu.



ATASSUT INATSISARTUNI

Ilisimavarput allamiut, pingaartumik danskit unamminarnerutittaraat, kalaallisullu oqaatsitta ilikkarluarnissaannut sukkanerusumik immaqalu kimeqarnerusumik ilikkariartortarlutik, nunaqarfinni najugaqarnermikkut, tamanna unnersiutigineqartarpoq, aamma oqaatsit kisiisa pinnagit, kisiannili kalaallit inooriaasitsinnik aamma annertuumik tassuunakkut pissarsisarput, inuiaqatigiinnilu akuunerunissamut aamma tassuunakkut tunngavissinneqartarput.

Siunnersuuteqartoq isumaqatigilluinnarparput innersuussutimini oqariartuutaanik. Aammalu Naalakkersuisut juunimi oqaatsit pillugit isumasioqatigiissitsinissaanni qulequttap tikinneqarnissaa pingaartutut isigaarput.

Naggataatigut ATASSUT-miit kaammattuutigissavarput, kalaallisut oqaatsitta suliffeqarfinni, pingaartumik pisortat pigisaanni, oqaatsit pillugit politikkeqarnissamik piumasaaqat inissinneqartariaqartoq, kiisalu aamma soorunami aningaasatigut malitsissai aqqissuunneqarlutik.

Taamatut oqaaseqarluta ATASSUT-miit oqaatsivut pillugit oqallinnermut qujavugut.